



XUNTA DE GALICIA

CONSELLERÍA DE MEDIO AMBIENTE,
TERRITORIO E VIVENDA



INSTITUTO
DE ESTUDOS DO
TERRITORIO

San Lázaro s/n
15781 Santiago de Compostela
Teléfono: 981 541 755/6
Fax: 981 541 757
secretaria.iet@xunta.gal
<http://mapas.xunta.gal>

Expediente IET: P-18-391.

Plan ou programa: Modificación puntual num. 4 do plan xeral de ordenación municipal.

Concello: Coirós (A Coruña).

Promotor: Concello de Coirós.

Expediente DXCACC: 2018AAE2240.

CONTESTACIÓN A CONSULTA NO PROCEDEMENTO DE AVALIACIÓN AMBIENTAL ESTRATÉXICA SIMPLIFICADA

Con data do 16/07/2018, a Dirección Xeral de Calidade Ambiental e Cambio Climático somete a consulta do Instituto de Estudos do Territorio (IET) o borrador e o documento ambiental estratéxico do plan ou programa referido no encabezamento, de acordo co artigo 60.4 da Lei 2/2016, do 10 de febreiro, do solo de Galicia, no marco do procedemento de avaliación ambiental estratéxica simplificada, de acordo co establecido na Lei 21/2013, do 9 de decembro, de avaliación ambiental.

1. Marco legal:

De acordo cos artigos 60.4 e 83.5 da Lei 2/2016, do 10 de febreiro, do solo de Galicia, e tendo en conta o disposto no artigo 30.1 da Lei 21/2013, do 9 de decembro, de avaliación ambiental, o órgano ambiental debe consultar ás Administracións públicas afectadas, poñendo á súa disposición o documento ambiental estratéxico e o borrador da modificación puntual que se somete a avaliación. Conforme ao artigo 5 da Lei 21/2013, entre as Administracións afectadas atópanse as que teñen competencia específica en materia de paisaxe.

En virtude do punto dous da disposición adicional segunda do Decreto 244/2011, do 29 de decembro, polo que se aproban os estatutos do organismo autónomo Instituto de Estudos do Territorio, este asume as competencias en materia de paisaxe, que se exercen de acordo coa Lei 7/2008, do 7 de xullo, de protección da paisaxe de Galicia.

2. Descrición da modificación puntual:

A modificación puntual ten por obxecto principal alterar as aliñacións dispostas actualmente para os treitos urbanos das estradas provinciais que descorren por solo de núcleo rural, establecendo unhas distancias maiores entre as aliñacións, que pasarán a ser con carácter xeral de 8 m. desde o eixo. A ampliación da distancia ao eixo afecta ao paso de 10 estradas provinciais en 11 núcleos rurais. A aliñación existente na actualidade (5 m. desde o eixo) non muda nos puntos nos que a proposta poida afectar a edificacións de carácter tradicional. Ademais do mencionado, a modificación puntual elimina un vial previsto no PXOM no núcleo de Castrillón, por consideralo innecesario; muda lixeiramente o trazado dun vial en Coirós de Arriba, para facelo perpendicular ao vial no que desemboca e reconece un camiño existente no núcleo de Parada, non recollido no PXOM.

O documento ambiental estratéxico inclúe algunhas mencións á afección paisaxística da modificación, para concluír que a alternativa escollida (alternativa 1) evitará os impactos negativos que xeraría a alternativa 2, que establece as aliñacións a 8 m. do eixo sen excepcións, pois suporía a alteración ou desaparición de elementos etnográficos tradicionais como vivendas e muros.



3. Análise da incidencia da modificación puntual sobre a paisaxe:

De acordo co Catálogo das paisaxes de Galicia, aprobado polo Decreto 119/2016, do 28 de xullo, (DOG do 25/08/2016), o concello de Coirós localízase na grande área paisaxística do Golfo Ártabro, na comarca paisaxística Golfo Ártabro Interior. Parte do termo municipal de Coirós forma parte da área de especial interese paisaxístico (AEIP) Fragas do Mandeo, recollida no Catálogo, pero ningún dos núcleos rurais afectados pola modificación puntual atópase nela.

A paisaxe do concello de Coirós ven determinado por un relevo formado polas presenza de ondulacións suaves do terreo cubertas, na maior parte dos casos, por bosque de repoboación, coa excepción das zonas ocupadas por núcleos de poboación e as súas áreas circundantes, nas que os usos agrícolas e gandeiros predominan. A parte norte do termo municipal está marcado polo val do río Mandeo e as súas fragas nas que a vexetación está formada por frondosas autóctonas. Esta carácter definidora da paisaxe ofrece dúas excepcións de importancia, por unha banda o trazado da autoestrada A-6, que atravesa a totalidade do concello, e por outra a descontinuidade que xera o polígono industrial, que comporta unha importante presenza visual, contrastando co resto do territorio. Os núcleos afectados pola modificación puntual, combinan edificacións de carácter tradicional, e mesmo elementos catalogados (casa reitoral de San Xián, capela de Espenuca Aldea ou o conxunto da Casa Grande dos Corral), con edificacións máis modernas.

A modificación non presentará unha forte incidencia paisaxística toda vez que a alternativa escollida para a modificación das aliñacións non vai afectar ningunha das edificacións que poidan presentar interese desde o punto de vista estético ou patrimonial, e que os cambios do trazado de viais do PXOM son puramente instrumentais.

4. Conclusión:

Polo que atinxe ás competencias deste departamento en materia de paisaxe, considérase que a modificación puntual número 4 do PXOM de Coirós non provocará un impacto paisaxístico significativo.

Cómpre lembrar que de acordo co artigo 7.2 da Lei 7/2008 (modificado pola Lei 12/2014, do 22 de decembro, de medidas fiscais e administrativas), e tendo en conta o disposto no artigo 83.5 da Lei 2/2016, do 10 de febreiro, do solo de Galicia, a modificación, tras a súa aprobación inicial, deberá someterse a informe do Instituto de Estudos do Territorio.

O xefe do Servizo de Planificación da Paisaxe
José Luís Álvarez Vicente

Visto e conforme, a directora do Instituto de Estudos do Territorio
Inés Santé Riveira

(Documento asinado electronicamente)

